

41
PROGRAMMA

QVO

RECTOR

UNIVERSITATIS ROSTOCHIENSIS

BERNHARDUS

BARNSTORFF

Med. D. Prof. Publicus & Poliater.

Ad

Passionem

DOMINI NOSTRI

JESU CHRISTI

ipfius FILII DEI


Contra

BACCHANALIA

ritè & attentius considerandam

Omnium ordinum Cives eâ quâ fas est,

humanitate seriò adhortatur.



ROSTOCHII,

Typis JOHANNIS WEPPLINGII, Acad. Typograph

Anno. Christi 1696, d. 23. Februarii

Illud etiam tempus, quô attentiori animo de passione Salvatoris nostri *Jesu Christi* sanctas subire cogitationes voluit antiquitas, statim sub initium corrumpere velle, ut Bacchi in morem immoderatè vivatur, non tam mirum quàm sceleratissimum est. Hocine est præparare animum ad rem sanctissimæ religionis eò ardentius considerandam? Hocine est non illotis, ut ajunt, manibus i. e. reverenter & circumspectè sacra accedere? Immo verò turpissimum est homini Christiano, ita ingenio esse corruptum, atque tam promte carnis mundi que obsequio indulgere. Bacchas quondam magnis clamoribus, tumultuque omnia implevisse, non adeò mirum videtur illi, qui feminas illas sicut furore correptas, ita & à pietatis sensu longe remotas novit. Et reliquos etiam gentiles ad ejusmodi morum depravationem abreptos fuisse, quid mirum? Homines fuerunt sibi relictī, sine *Christo* in mundo viventes, suisque sensibus jam ad omne opus bonum prorsus inutiles facti. Eos autem, qui *Christo* nomen dederunt, ita tamen intemperanter adhuc se gerere, ut bacchantium intemperiem & sequi velint & sequantur, ab omni illorum ratione & religione abhorre merito existimatur. Ita verò proh dolor! insidias variè hominibus struit diabolus, ut, quos apertâ vi aggredi non audet, eos per fraudem circumveniat, voluptatibus carnis propofitis, peccatisque opinione fragilitatis cujusdam humanæ se excusantibus. Dum ergo sacra & veritatem apud nos planè subvertere desperat hostis ille vaferrimus, id tamen agit, ut, quantum fieri potest, homines in securitatem conjiciat, atque sacra profanis misceat, relictâ modò religionis specie. Quid periculofius, quid nocentius esse potest? tantum veritati inde accedit detrimentum, ut apud plerosque illa non animum, sed linguam modò occupet, non pectus, sed faciem modò externam ad pietatem transformet, viresque suas nunquam satis explicare possit. Quid proderant quæso sive veritas sive leges, quibus circumscripta velut erat gens Israelitarū, cum ad lascivum carnis obsequiū raperentur Num. XXV. ? Ita tum animus jam in libidinem solutus erat, ut non veritatis perlyasione, (ita enim securi videbantur esse)

sed



58700/41

sed gravi poenarum castigatione ad officium redire oporteret. Et
annon qui in Bacchanalibus carnis desiderium explere satagunt
veritatem etiam suo loco relinquunt, parum curantes, quanta
vitæ circumspeditione sit opus iis, qui fidei indolem ea, qua fas est,
cautione intelligunt atque exponunt? Aut annon, dum in obsequi-
um utriusque & fidei & carnis animum formare volunt, id moli-
untur, ut res, quæ sunt sibi invicem planè adversæ, in mutuum ta-
men societatis vinculum coeant? Adeo suaviter in hominum per-
niciem diabolus vires colligit, ut & carni nostræ per omnes ferè
voluptatis partes benè esse in vita velit. Pudet jam & tædet
in Bacchanaliorum sordes & scelera diutius inquirere, eorumque
usum & progressum, quo hominum res magis afflictæ sunt, al-
tius repetere. Satis exquisitè, quicquid hîc rei aut sceleris est, Viri
longe doctissimi jam excusserunt, scriptisque suis reliquerunt. Re-
spiciamus potius eò, ut tam inveteratæ apud homines consuetudi-
ni viribus quantum licet, maximis occurramus atque obicem po-
namus. Quicunque ergo Christiani nomen præferre juxta & tu-
eri eâ qua decet, pietate cupimus, non animo patiamur
excidere nostro illud, quod seriò monet Apostolus Ebre. xiii. 12.
*seqq. JESUS quò populum suum proprio sanguine expurgaret, passus est,
extra portam. Egrediamur ergo ad illum extra castra, opprobrium
ipsius ferentes: non enim manentem hic habemus civitatem, sed futu-
ram inquirimus.* Si verborum gravitate, si rationum pondere res
adhuc agi potest, ut Bacchanaliorum detestabiles ritus ex Christi-
anorum civitate quàm longissimè ejiciantur atque proscribantur,
hoc Apostoli effatum huc optimè conveniet. Ecce! quanto pre-
tio & sanguine stetit nostra redemptio à peccatis & seculi hujus cor-
ruptione. Eramus quidem populus, sed rebellis, sed refracta-
rius cui nec voluntas, nec vires parendi ullæ amplius relictæ erant:
ut iterum fieremus populus Dei acceptus, eheu! quantæ res dif-
ficultatis fuit. Ipse *Filius Dei* ut populum nos sibi repararet, ho-
mo factus similitudinem populi sui, quanquam sine ulla labe, in se
prius recipere & voluit & opus habuit. Ejecti eramus paradiso
loco illo spectabilis admodum amoenitatis! Ipse, JESUS etiam
qui

qui prædis loco pro nobis successit, urbe debebat ejici, ne nostrum exilium sine fine esset. Cœli jure & civitate expulsi eramus! Vah! quàm miserabilis tunc erat facies rerum nostrarum. Cœlum minabatur quamvis adversam tempestatem, ut ne oculos quidem eò attollere integrum esset, & quæ in terra ante pedes erant, non nisi mortis ruinam & internecionem omnem videbantur afferre. JESUS itaque noster, quò ad cœlum nobis iterum pateret aditus, ultra etiam sortem humanam omni jure indignus habebatur, juxta & iniquissimè ab hominibus tractabatur, tanquam purgamentum quoddam extra portam projiciendū. Significatum jam antè id erat in V. T. sacrificio, quo singulis annis unâ tantum vice peccata omnium singulari planè ratione expiabantur, eâ tamen lege, ut postquam sanguine hilasterium septies aspersum erat, ea, quæ ex hirco reliqua erant, præter sanguinem extra urbem efferrentur, igne penitus absumenda & concremanda, ne quicquam in ulum Sacerdotum cederet Levit. xvi. 27. Christus nimirum tanquam verum sacrificium & unicum, cujus virtute omnia jam prius in V. T. valebant, ita se offerre Deo voluit, ut nihil sui esset, quod non in satisfactionem pro nobis & in sumeret & conferret. Extra portam itaque iræ Divinæ incendio & amore salutis nostræ adeò flagrabat, ut sanguinem omnem effunderet, & Corpus exanimatum penderet tanquam spectaculum non sine luculentissimo expiationis jam factæ testimonio omnibus intuendum. Immundi eramus pessimè & mente & conscientia & cunctis agendi viribus, quibus vitæ nostræ fit significatio, ut non posset non à nobis *DEUS* longissimè faciem avertere, pariter & recedere. Jam *Christus* pro nobis intercessit tanquam interventor efficacissimè apud Deum pro salute nostra interpellans: Non ergo ipse in cœlo, loco illo sanctissimo, non in urbe Hierosolyma, ubi templum erat sanctissimæ religionis, sed extra portam debebat tanquam piaculum quoddam mactari. Peccatum enim erat factus ipse *Christus* pro nobis II Cor. v. 21. & maledictio legis Gal. i. 3. Ast quantæ abominationis res est peccatum! Peccatores quidem nos sumus omnes, sed quamdiu in hac vitâ spes gratiæ esse potest, nondum

peccatum

peccatum ipsum. Talis enim, qui est, ei non tantum imminet ira divina gravissimè, sed ita eum etiam supprimit, ita angit, ut, dum nudus homo est, in æternum cruciari & perire necesse habeat. Peccatum namque ipsum sicut nulla unquam misericordiâ dignum esse potest, ita, qui jam tali nomine venit, omnem sensum iræ divinæ experitur plane intolerabiliter. Vah! quantam in eum miserabilem hominem maledictio legis incurfionem facit. Quàm horribili modo eum non tantum incessit timor, sed ita affligunt supplicia nullâ linguæ virtute exprimenda, ut prorsus præstaret non esse, quam ita malè esse. Quamdiu verò hic homo spiritum vitæ ducit, adhuc sensum aliquem habet gratiæ divinæ, quâ illum DEUS suâ bonitate ad vitam vult resuscitare. Sanguine enim *Christi* reconciliatus DEUS cum mundo, nulli gratiam neque sceleratissimo cuique, quamdiu hic spirat, ex odio quodam simpliciter subtrahit, sed liberalissimè eam omnibus offert II. Cor. V. 19. seq. ut peccatum hic quidem circumferant omnino homines, sed nondum ad peccatum ipsum, tanquam ad terminum pœnarum ultimum sint constituti. At verò *Christus* ipse *Filius DEI* ita peccata omnium in se derivavit, ut in oculis Dei non nisi abominationi esset omnibus ferè modis detestabili conf. Matth. XXVII. 46. Extra portam itaque à societate etiam hominum ita erat removendus, ut, licet magna ipsum hominum multitudo spectatum comitaretur, ipsum tamen indignum judicarent omnes, paucis quanquam exceptis, quocum amplius conversarentur. Et nisi infinita fuisset virtute ipse præditus, quâ omnem etiam iræ divinæ impetum sustinere potuisset, ipsi tandem superabilem, nunquam tanto ex malo eluctari, nunquam emergere viribus ejus fuisset permissum. Adeò violentâ morte JESUM nostrum extingui oportuit, ut nos, qui in mortem æternam incideramus, inde eriperemur, & ad vitam fieremus reduces! Adeò sanguinis profuvium pati debuit Salvator optimus, ut ne minima quidem gutta in corpore relinqueretur, ne fraudem morti subesse suspicarentur homines, & quò magis abundaret redemptionis pretium cruentissimum pariter & certissimum. Adeò abjecte & vilissimè extra portam fuit suspensus JESUS noster, ut cœli porta pateret iterum omnibus, & ad JESUM, in sanguine

guine suo aspiciendum nulli intercluderetur aditus ! Quis nostrum non omni jam animi contentione ad tantæ salutis properaret contemplationem, quæ extra portam est proposita omnibus ! Quis mundi sive voluptatibus sive placitis se ita amplius capi & contineri pateretur, ut ad spem meliorem sibi ipsi deesse velit ? Egrediamur tandem sinceritate quadam animi ad JESUM Dominum nostrum extra castra atque strepitum hujus mundi satis tumultuosum ! Prohibuit Apostolus v. 9. leges amplius observare, quæ de cibis aliisque rebus circa sacra V. T. erant latæ, tanquam ipsa significatione sua, interpositâ redemptione *Christi*, jam prorsus inutiles. Eum enim etiam in finem ostendit v. 12. *Christum* portâ egressum esse, ut immunditiem populi una vice è medio tolleret, immolationeque unicâ perficeret, quicquid ad satisfactionem nostram ira divina sibi fieri voluit. Et ne inde fides ipsa crederetur per se mutata esse, jam cautum erat v. 8, dum *Iesus Christus* heri & hodie idem ille & in æternum, sed circumstantias modò quasdam abrogatas esse Apostolus docet, quum, quæ futurum *Christum* respiciebant, ipso jam manifestato, nullum usum amplius præstare ex meritò intelliguntur. Quod si jam neque legibus circa ritus V. T. obtemperare amplius oportet, quid, judicate ipsi, de mundi voluptatibus, deque aliis mundi rebus, quas hominum studia sibi variè præfigunt, statuendum. Præferebant adhuc ritus illi voluntatem aliquam Dei ; ast quid voluptates mundi, quid aliæ corrupti hujus seculi consuetudines ? Tantam res illæ sua prorsus indole afferunt juxta & disseminant ingenii humani labem, ut ad bonum ritè procurandum neque vires neque consilii copia reliqua sit. Egrediamur ergò mundo, genialibus illis Quadragesimæ diebus, quibus cuticula benè curatur, (Carneval vulgò dictis) nuncium serio mittentes. Annon Christi opprobrium ferre jubemur ? Ast ita in diem vivere quodnam opprobrium ? Ea demum est Christianorum gloria ita paratum esse animo, ut rebus mundi non tantum cautè & parcè utamur, sed etiam abnegatâ nostra voluntate, non adeo vitæ commoditatem sequamur, æquè potius ferentes, quicquid gravius propter fidem Christi in nos consulatur. Verebantur scilicet

scilicet tunc temporis ex Judæis Christiani facti varias calamitates ab iis, qui Judaicos ritus adhuc urgebant pertinaciter, si quando à Judæorum consuetudine illâ tandem prorsus abstinerent. Confirmare ergò ipsorum animum vult Apostolus, ne metu deterriti segniores fierent in opere Dei, sed pro libertate sua in quam Christi sanguine vindicati essent, pugnarent confidenter, tanquam ipsius crucis Christi participes sic laudabiliter futuri. Nos verò, quibus ejuscemodi difficultates crucis ab hostibus non obijciuntur, quid jam nostrum esse censebimus? Id sanè nobis incumbit, ut carnem ipsi nostram crucifigentes, h. e. affectus sive iræ sive libidinis, ne ita licenter erumpant, comprimentes, ad similitudinem vel aliquam opprobrii Christi accedere videamur. Exeamus ergò portis mundi, ne sive nobis ipsis placere amplius studeamus, sive in aliud minus rectè vivendi genus, prout hominum fert consuetudo, prolabamur. Quam afflicti sunt illi, qui, dum fugere licet, intra portas in obsidione manent! Quantum subinde terrentur machinis ignivomis, quibus quatiuntur ædificia, aut aliorum corpora? Et quæ mala non in ipsorum perniciem concurrunt? Qui foris degunt, fugiendi locum habent aut aliter adhuc sibi consulendi feliciorum. Et quam quæso calamitatis fortunam experiuntur illi qui in mundo, tanquam in domicilio suo, habitandi non commorandi tantum locum sibi datum esse persuasum habent. Certè quemadmodum misere fallebantur olim, qui Hierosolymam tanquam locum perpetuis sacrificiis etiam perpetuò futurum sperabant, inque eas angustias obsidionis tempore redigebantur, ut gravissima quæq; etiam in se ipsos mutuò decernerent, ita illis aliquando idem obtinget, qui hic sibi velut fixas sedes rati, non quæ futura sunt, maturè cogitant, sed omnem rationem vitæ modo præsentis habent, in libidines suas adeò proni, ut ad quemvis earum impetum jam velint, quod lubet. En hominum levitatem! O cæcos mores! Quis intra mundum ita conversandi porro voluptate duceretur aut consilium iniret? Fugiamus ergò mundum, quotquot diligentiores videri volumus in iis, quæ sunt animæ nostræ, & ad æternitatem pertinent. Cumq;

Bacchanalia

Bacchanalia omnem sanæ mentis curam prorsus ex animo dimoveant, atque vitiorum catervæ utramque, ut ajunt, fenestram quàm latissimè aperiunt, vobis ipsis, *Cives optimi*, jam judicandum relinquo, annon tandem è re nostrâ sit, melius sapere, illamque pestem cane pejus & angue ex finibus nostris depellere. Cogitate insanos illos mores, quibus vitam suam conspurcant Bacchantes! Cogitate illâ aut violentiâ aut spurcitiem lingvæ, quâ boum instar solent per plateas clamare & inverecundè obscæneque loqui! Cogitate illam tandè impotentiâ animi, quâ se malunt in peregrinas sive bestiarum, sive aliorum hominum, sive vel ipsius diaboli figuras transferre, quàm ad morum gravitatem atque elegantiam vitam componere! Discedamus quàm longissimè ex ejusmodi hominum societate! Portæ hæ sunt inferorum, quibus ad æternam infelicitatem præcipiti tandem lapsu feruntur homines, qui intra illas subsistunt. Non ita syaviter & molliter titillemus carnis sensus, satis jam ad ambitionis, ad gloriæ propriæ, & ad omnis libidinis pruritum stimulantibus & turgidos. Contueamur JESUM nostrum acerbissimè patientem! In hujus sanguine, in hujus clamore, cum se derelictum quæreretur, & cum animam sanctissimam efflaret, intelligamus vel tandem aliquando, quid sit peccasse & peccare, & quanti laboris sit ex peccatis hominem cum justitiâ Dei reconciliare. Si neque ipsi *Filio* propter aliena peccata Deus pepercit, quid tuturum illis, qui ob sua crimina iram Dei tandem omnem sibi contrahunt, ut in æternum pereant. Quare, *Cives optimi*, cum res seria hic agatur, non committamus jam, ut cum peccatis ludere videamur, nobis ipsis in re tanti periculi deficientes. Quid enim habet vita secura, scelerata & prodiga sui, nisi insaniam & desperationem abjectissimi animi? Surgamus ergo extra castra sive nostræ securitatis, sive mundi, quantâ fieri potest, velocitate contendentes! Sequamur JESUM nostrum extra mundum, inque ejus passione & vires animi reficiamus, & quicquid est rei sive gaudii nostri, plenissimè ponamus. Valet.

P. P. Sub Sigillo RECTOR. ipla Dom. Quinquagesimæ A. M. DC. XCVI.